



UKA 2017/58

10/10-2017

Randi Vestergaard Evaldsen

Timersortartut nuna tamakkerlugu unammisartut peqataanerisa taakku sulliviinnut imaluunniit ilinniarnernanut sapinngisamik ajoqutaasinnaasumik kinguneqaqqunagu qanoq iliorluni timersortartut nuna tamakkerlugu unammisartut atugaat pitsanngorsarneqarsinnaanersut misissoqqullugu Naalackersuisut peqquneqarnissaannik Inatsisartut aalajangiiffigisassaattut siunnersuut. Kalaallit Nunaanni Timersortartut Kattuffiat, immikkut kattuffiit kiisalu allat susassaqtartut soqutigisaqaqatigiit misissuinermut UKA2018 tikitsinnagu Inatsisartunut agguaanneqartussamut peqataatinneqassapput.
(Inatsisartunut ilaasortaq Nivi Olsen, Demokraatit)
(Siullermeerneqarnera)

Siullermik Nivi Olsen qutsavigerusuppara manna siunnersuut pitsaasoq pillugu, isumaqarama pissusissamisoortoq inissaminiittorlu una sammisaq qaqissallugu.

Meeraaninni inuusuttuuninnilu timersornikooqaanga. Suli ulloq aamma tikillugu timersortarpunga kisianni inuusunnerugallarnittut sakkortutiginningsumik. Suli nuannerluinnartarpoq. Inooriaaseq pitsaasoq inuunermilu qiimaneq pilersinneqartarput. Timi kiffaanngissuseqartutut peqqissutullu misigisarpoq. Suli amerlanerit timersortalertariaqaralarput, peqqinnartuuvoq aammalu qularnanngilluinnartumik peqqinnissaqarfimmuut inunnillu isumaginninnermut aningaasartuutit appassagalarput amerlanerit peqqinnartumik inooriaaseqalartuuppata. Ilisimatuussutsikkut uppersarsineqarnikuvoq timersornerup timi ajunngitsumik peqqinnermillu sunnertaraa. Peqqinnerungaanni imminut paarinerusinnaaneq pilersarpoq. Takusinnaavarput sutigut peqqinnissaqarfippuut artorsartinneqartoq aammalu nappaaterpassuut ilaatigut ingalassimaartinneqarsinnaagalarput timersorneq, eqaarsarneq aalanerlu aqqutigalugit.

Uanga nammineq ilisimasaqarpunga timersorneq aqqutigalugu "inuunermik annaassineq" - Inuit imigassamik ikiaroorartumillu hashimik assigiinngitsumik atornerluilersussaagaluit nunatsinnut pikkorinnerisugaallutik pitsaanerpaatullu ambassadørinngortarput, timersorneq aqqutigalugu. Timersorneq pinaveersaartitsisarpoq aammalu immikkoortuuvoq ullumimut naleqqiullugu sulissutigisariaqaralarpoq.

Isumaqarpunga naapertuuttoq misissuisoqarnissaa, soorlu siunnersuummi siunnersuutigineqartoq. Naalackersuisullu itigartitsinissamik inassuteqarnerat tupaallannartuunngilaq. Konto 40.94-13-mik utoqqatsissuteqarnerat uanga atorsinnaanngilara, aningaasammi tassaniittut naammanngillat. Nammineerlunga Kalaallit Nunaat sinnerlugu nunanut allanut unammisartumik ilaqaqarpunga. Qularutigissanngilarsilu timersuutini tamakkiisumik pimoorummagu, ilaannikkut ilaqtutani kingulliuttarlugit. Ullumikkut pissutsit taamak ittut pissutaallutik timersortartut taamaattut sapaatip akunneranut tallimariarlutik-arfinileriarlutik-arfineq-marloriarlutilluunniit sungiusartariaqartarput, arlaleriarlutik nunartik sinnerlugu unammiaartortarput saniatigullu suliffeqarlutik paarisariaqakkaminnik. Timersortartoq taanna sulisariaqartarpoq nalunaaqutaq ullaassakkut sisamat-tallimaniit ilaannikkullu aatsaat soraartarluni aqqarngup unnuap-qeqqatalu missaani, akunnernik angalanermini atugassaminik katersilluni, taamatuttaaq weekendtini sulisariaqartarpoq. Ilaqtariinnut tamanna peqqinnarpa? Meeqqanut peqqinnarpa? Naamik! Ilaqtariinnut tulluarpa? Naamik.



250.000 koruunit, assammik arsartartutsinnut arnanut angutinullu, isikkamik arsartartunut angutinut arnanullu, sulorartartunut, nerrivimmi arsaarartartunut il.il. naammappat? Naamerluinnaq. Tamatuma uppersaannarpaa Naalakkersuisut timersorneq sumiginnaraat. Timersorneq, eqaarsarneq aalanerlu ilumoorunneqanngippallaqaat.

Timersortartuuneq pequtigalugu sulinermi annaasanut tunngatillugu paasisama eqqumiikujuttut ilaat tassaavoq VM-mut, Pan Amerikanske Mesterskabinut angunniunnissanut sungiusartoqartartoq. Pissartanngorniunnernut taakkununga anngunniaraanni unammisaqattaarnerit aqqusaartariaqarput (NORCA). NORCAp ataani nuna tamakkerlugu unammisartut angusaqarunik PanAM-mimut peqataasinnaalersarput. Tassunga atatillugu nuna tamakkerlugu unammisartut unammisoqarnerit tamaasa ullut 14-t 21-llu akornanni angalasariaqartarput, tassa qaammatip aappaa avillugu siviutigisumik, saniatigullu aamma allani unammisaqattaartarput assersuutigalugu Islandimi nunanilu allanut. Eqqumiitsortaraali PanAm-mut peqataagunik sulinerminni annaasaqaataat matuneqarsinnaammat, tassunga anngunniunnerminni annaasaat taarserneqarsinnaanngillat, NORCA nunarsuaq tamakkerlugu unaminertut isigineqanngimmat. Kisianni PanAm-mut anngunniaraanni tassani anngunniunnerit aqqusaarneqaaqartariaqartarput. Tassa imaappoq nunanut allanut unammisartut periarfissaqanngillat sapaatip akunneri pingasut tikillugit annaasaminnik utertitsiffigineqarnissaminnut. Tamatuma ilaatigut kingunerisarpaa, unammisartut ilaasa peqataanngiinnarnissaminnik eqqarsalernerat pissutigalugu unammisartunut akisuallaarmat. Nunanut allanut unammisartut unammeqataanngitsooriaannaapput aammalu nunanut allanut unammisartut pikkorinnerpaartaat ilaanngitsooriaannaasarpud. Tamanna naapertuuppa? Tamanna Naalakkersuisunut akitikkusukkaluarpara. Uanga nammineq akissutigarsarippoq. Uanga naaggaassaanga, tamannalu assersuutaaginnarpoq taamaakkaluortoq Naalakkersuisut itigartippaat 250.000-mininnguit utoqqatsissutitut atorlugit. Nunanut allanut unammisartuuneq naleqarpoq, allaqqunneqarsinnaanngilaq.

Assersuut aana alla. Isikkamik arsartartuugaanni, imaluunniit volleyball-rtartartuugaanni, nunanullu allanut unammisartuulluni, taava tamanna inuup nammineq akilertarpaa, imak paasillugu unammiaarnerit peqataaffigisartagaat, assersuutigalugu unammiaarnernut Island Games-itut ittunut tapiisnaannginnamik. Taava taamaallutik ilaatigut qaammat ataaseq affarlu namminneerlutik akilertarpaat, ilumut pissusissamisoorpa aamma tamanna, Naalakkersuisoq tassunga akitikkusuppara.

Aningaasartuutit ilaasa matuneqarnissaat kisimi pineqanngilaq, nipangersaataaginnartutut isgigaara, takutikkusuinnarlugu timersorneq tapersorneqartoq, kisianni ilumut taamaattoqarpa? Uanga oqarusuppunga naamerluinnaq.

Uanga isumaqarpunga nunatsinni imartuumik timersornermut politikkeqartariaqartugut. Inuiaqatigiinni inuuneq susasaqartitsinerlu ammartariaqarparput. Inuuneq pilluarnartoq nuannaarnerlu pilersinneqartarput - inuiaqatigiinni sorpassuit siuarsarneqartarputtaaq. Pisariaqarporli politikerit sinaakkutissanik pilersitsinissaat timersornermut politikki aammalu inatsisit sinaakkutissallu aqutigalugit. Uani pineqarput pinaveersaartitsineq, timersortarfiit, atuarfiit, peqqinnissaq, peqatigiiffilerineq il.il. Timersornerup inuiaqatigiinni suliniutit aallartittagai oqaatigineqanngitsut amerlaqaat, tamanna ajorpoq uggornarlunilu. Naalakkersuisut timersorneq taamaattussaannartut isigaat. Uanga isumaqarpunga timersorneq inuiaqatigiinni aningaasaliinerit pitsaanerpaat ilagigaat.



Timersortartugut taakkuupput nunatta ambassadøriinut pitsaanerpaanut ilaasut - uangutsinnit politikerinit pitsaanerupput, unammisarput, aaqqissuussinernut peqataasarput, oqarsinnaangilagullu uagut politikerit taamaattuaannartugut ataatsimiititaliat sinnerlugit angalagaangatta, uanga nammineq misiginikuuara arlallit ataatsimiinnernut, aaqqissuussinernut il.il. takkutinnitsoortartut - uanili pisagut tamarmik ullut tamaasa peqataasarput, tupinnaqaaq Naalakkersuisut suliniutissaq itigartimmassuk, Naalakkersuisullu takuteqqiinnarpaat oqaatsit kusanartut imaqqanngitsut.

Naalakkersuisoqatigiit isumaqatigiissutaanni allaqqavog timersorneq inuulluataarnissamut pingaaruteqartoq aammalu naalakkersuisoqatigiit timersornerup pinaveersaartitsineranut qanoq pingaaruteqartiginera ilisimagaat il.il. Tamannali timitaqqanngilaq, uanga isummanni.

Aamma allaqqavog "Timersortartut nunarput sinnerlugu unammisartut erfalatorput atorlugu unammisinnaassapput, aammalu timersornermut kattuffiit nunat tamalaat akornanni kattuffissuarnut ilaasortanngorsinnaasariaqarput" aamma allassimavog "Timersornermik ingerlatsisut unammersuarnernut peqataajartornerminni tamatumalu saniatigut utoqqalinersiallit siusinaarlutillu sulisinnaajunnaarnerisutisiallit angallannermi akikillisaavigineqarsinnaanerit siunertaralugu sulisoqassaaq"

Suna iliuuserineqarpa? Imaluunniit oqarluartaarnerinnaava qineqqusaarutaallutillu isumaqqanngitsut?

Soorunami misissorneqartariaqarpoq - aamma inissaminiiginnarpoq pissusissamisoorlunilu, inuit akissarsisarnissaat, sulinermit akissarsiatigut annaasaqarneq pissutigalugu, sualummik suliaqaraanni taama angitigisumik nunagisaq sinnerlugu.

Siunnersuutip Kulturimut, Ilinniartitaanermut, Ilisimatusarnermut Ilageeqarnermullu Ataatsimiititaliami suliareqqinneqarnissaa innersuupparput.